



# VEDTEKTER FOR BARNEHAGANE I SELJE KOMMUNE



Gjeld frå og med 12. desember 2018: KS-102/18

# **VEDTEKTER FOR BARNEHAGANE I SELJE KOMMUNE**

## **PARAGRAF 1: EIGARTILHØVE**

Selje kommune eig og driv barnehagane.

Barnehagane i Selje er pedagogiske verksemder som vert drivne i samsvar med:

- Lov om barnehagar av 17. juni 2005 med tilhøyrande forskrifter
- Rammeplan for barnehagen
- Vedtekten for dei kommunale barnehagane i Selje
- Kommunale vedtak som t.d. budsjett, instruksar m.m.
- Årsplanen til barnehagen

## **PARAGRAF 2: FØREMÅL**

(§ 1 – Barnehagelova)

*"Barnehagen skal i samarbeid og forståing ivareta dei behov barn har for omsorg og leik, og fremje læring og danning som grunnlag for allsidig utvikling.*

*Barnehagen skal bygge på grunnleggande verdiar i kristen og humanistisk arv og tradisjon, slik som respekt for menneskeverdet og naturen, på åndsfridom, nestekjærleik, tilgjeving, likeverd og solidaritet, verdiar som kjem til uttrykk i ulike religionar og livssyn og som er forankra i menneskerettane.*

*Barna skal få utfalde skaparglede, undring og utforskarrang. Dei skal lære å ta vare på seg sjølv, kvarandre og naturen. Barna skal utvikle grunnleggande kunnskapar og dugleikar. Dei skal ha rett til medverknad tilpassa alder og føresetnadar.*

*Barnehagen skal møte barna med tillit og respekt, og anerkjenne barndomen sin eigenverdi. Den skal bidra til trivsel og glede i leik og læring, og vere ein utfordrande og trygg stad for fellesskap og vennskap. Barnehagen skal fremje demokrati og likestilling, og motarbeide alle former for diskriminering."*

Aktivitetane i barnehagen skal ta utgangspunkt i rammeplanen for barnehagar .

## **PARAGRAF 3: OPPTAK AV BARN**

Det er eitt hovudopptak i året. Søknadsfrist 1. mars med kunngjering på heimesida og i lokalavisa. Alle nye som ynskjer plass for neste barnehageår, må søkje innan denne fristen . Dei som ønskjer auka plass eller andre endringar, søker også til denne fristen. Det kan gjerast supplerande opptak gjennom året, til dømes ved særskilte tilhøve\* og om økonomi og bemanningssituasjon gjev rom for det. Opptaket er samordna mellom barnehagane i kommunen, jf. Lov om barnehager § 12 og føresegner om sakshandsamingsreglar ved opptak i barnehage. Kommunen er opptakskrins. Det er styrarane i dei einskilde barnehagane som gjer opptak.

Søknad om endring av barnehageplass vert å handsame på same måte som nye søknadar.

Det er høve til å søkje slik plass:

3, 4 eller 5 dagar/ veke à 9 timer

Barn har rett til barnehageplass i tråd med Lov om barnehager § 12 a. Rett til plass i barnehage.

\*Særskilte tilhøve:

Barn med nedsett funksjonsevne har rett til prioritet ved opptak i barnehage. Det skal gjerast ei sakkunnig vurdering for å vurdere om barnet har nedsett funksjonsevne.

Barn som det er fatta vedtak om etter lov om barneverntenester §§ 4-12 og 4-4 andre og fjerde ledd, har rett til prioritet ved opptak i barnehage.

Barn med trong for særskilt språkstimulering/ språkopplæring skal ha prioritet ved opptak i barnehage i Selje kommune. Kommunen skal kartlegge kva dugleik barnet har i språk før prioritering ved opptak.

Kommunen har ansvaret for at barn med rett til prioritet, får plass i barnehage (Lov om barnehagar §13)

#### **PARAGRAF 4: OPNINGSTID – TILBOD**

1. Barnehagane har fylgjande tilbod: 5, 4 eller 3 dagar pr. veke.  
Opphaldstid: Klokka 07.30-16.30.
2. Rådmann fastset årleg barnehageruta der dei 5 lovpålagde planleggingsdagane vert fastlagde.  
Barnehagane er alltid stengde julaftan og nyttårsaftan.
3. Ferie:  
I løpet av barnehageåret skal alle barn ha 5 veker ferie. Ei veke blir brukt i samband med planleggingsdagar fordelt på heile året, jfr. barnehageruta. Minst 3 veker samanhengande skal i hovudregelen takast ut i tidsrommet 15.05.-15.08. Fastsettjing av ferie må avtalast med dei einskilde barnehage i god tid – før 1. mai. Dersom nokon ynskjer unnatak frå hovudregel, søker ein skriftleg til styrar i barnehagen på førehand.
4. Dagar der det erfaringsmessig er redusert barnetal, kan barnehagen føreta ei påmelding for å tilpasse bemanninga.

## **PARAGRAF 5: FORELDREBETALING**

Kommunestyret fastset oppholdstider og satsar for foreldrebetaling og gebyr i tråd med gjeldande vedtak i Stortinget og i henhold til forskrift om foreldrebetaling. Satsane kan endrast pr. 01.01. og 01.08.

Foreldre/føresette betaler for 11 månader i året. Juli er betalingsfri månad.

Foreldre/føresette betaler fullt ut for den plass barnet har fått tildelt. Plassen er bindande for kvart halvår.

Dispensasjon frå ovannemnde kan innvilgast dersom barnet flyttar frå kommunen eller ved alvorlege helsemessige tilhøve med barnet – fråvær over 3 mnd. Slik dispensasjon kan gjevest av styrar i den einskilde barnehagen med oppseiingstid på 1 - ein - månad.

Betaling skal skje innan fastsett betalingsfrist. Betalinga blir kravd inn kvar månad. Ved manglande betaling, misser barnet plassen dersom det ikkje er betalt innan purringsfrist. Kommunen vil likevel krevje inn pengane. Ved for sein eller manglande betaling gjeld lov om renter ved forseinka betaling av 17.12.76 nr. 100, samt inkassolova av 13.05.88 nr. 26 med forskrift fastsett i kgl. res. av 14.07.89, tvangsfyllbyrdelsesloven av 26.06.92 og endringslov til tvangsfyllbyrdelsesloven mv. av 17.06.05, og tilsvarende forskrifter. Vedtak etter 2. og 3. avsnitt kan påklagast (§§§ 27, 28 og 29 i Forvaltningslova). Formannskapet er klageinstans.

## SYSKJENMODERASJON:

\*Full pris for det barnet som har det dyraste tilbodet.

\*30% moderasjon for barn nummer to.

\*50% moderasjon for dei øvrige barna.

Moderasjonen gjeld sjølv om barna er i ulike barnehagar i kommunen.

## GEBYR VED FOR SEIN HENTING:

Barnehagen stengjer kl. 16.30, og barn med foreldre skal vere ute av dørene då.

Dersom barna blir henta etter fastsett tid, skal dette straks takast opp med foreldra og foreldra skal illeggjast eit gebyr pr. gong – noko dei skal ha melding om.

Gebyr ved for seint henta barn pr påbyrja halvtime kr. 500.-

## **PARAGRAF 6 : OPPSEIING AV PLASS/ DELAR AV PLASS**

For vårhalvåret: Oppseiingsfrist 1. november.

For neste bhg.år: Oppseiingsfrist 1. mai.

Skriftleg oppseiing sendast styrar i barnehagen. Ved særlege tilhøve kan styrar godta oppseiing av plass før/ etter fristane – jamf. § 5.

## **PARAGRAF 7: FORELDRERÅD OG SAMARBEIDSUTVAL**

### **Foreldreråd**

Kvar barnehage skal ha eit foreldreråd der foreldra/føresette til alle barna i barnehagen er medlemmer. Styraren i barnehagen syter for at det vert kalla inn til det første møtet i kvart barnehageår.

Det vert halde 2 foreldremøte i året – foreldrerådsmøta er gjerne knytt opp mot desse møta. Det er viktig og avgjerande for samarbeidet at alle foreldre møter på foreldremøte.

### **Samarbeidsutval**

Kvar barnehage skal ha eit samarbeidsutval samansett av

- 2 representantar for foreldra/føresette, valde av foreldrerådet for 1 år
- 2 representantar for dei tilsette, valde av personalet for 1 år
- 1 representant for kommunen, vald av Formannskapet for 4 år.
- Styrar er sekretær i samarbeidsutvalet – utan stemmerett.

Kommunen kan bestemme at det skal vere felles samarbeidsutval for barnehage og skule.

## **PARAGRAF 8: INTERNKONTROLL**

Barnehagen har utarbeidd dokumentasjon etter fastsett forskrift om internkontroll i høve til:

- Lov om miljøretta helsevern i barnehagar og skular
- Lov om arbeidsmiljø
- Brannvernlov
- Lov om produktkontroll.

Dokumentasjonen omfattar mål, rutinar og prosedyrar for å ivareta helse, miljø og tryggleik.

## **PARAGRAF 9: AREALUTNYTTING**

Netto leike- og oppholdsareal inne er 4 kvm. pr. barn over 3 år og 5,3 kvm. pr. barn under 3 år.

Leike- og oppholdsareal ute må minst vere på 24 kvm. pr. barn.

Med netto leike- og oppholdsareal meiner ein det areal som faktisk står til rådvelde for barna sine aktivitetar.

## **PARAGRAF 10 : ENDRING AV VEDTEKTENE**

Kommunestyret eller det organet som kommunestyret delegerer myndet til, godkjenner vedtekten for barnehagane i Selje og avgjer eventuelle tvistar kva gjeld tolking av vedtekten. Ved omfattande revisjonar skal desse sendast ut til høyring i barnehagane før endeleg vedtak blir gjort. Reviderte vedtekter vert gjort gjeldande for alle etter at dei er politisk godkjende – også for dei som tidlegare har fått fast plass.